

wol vns leider fur augen, was fur eine beschwerliche, ergerliche vnd hoch-
 schedliche trennung vnd zerrüttung hieraus vnter vns selbs zu befürchten
 vnd zu befahren sein wil, daneben auch wol verstehen, wie hoch dessen allen
 unsere gemeine Feinde sich frewen vnd darüber erlustiget werden, viel auch
 5 derselben nachmals zu schreien vnd vns zu beschuldigen keine schew noch
 scham haben werden, als ob wir selbs durch vnser allzu viel vertrawen vnd
 gelindigkeit zu solchem vbel vrsach gegeben vnd daran nicht weniger als
 diejenigen selbs, die sich des Sacramentschwarms teilhaftig gemacht, schül-
 dig sein.

10 [B 3r:] Vnd demnach es leider mit uns vnd vnsern Kirchen schier das anse-
 hen haben vnd gewinnen wil, das der Prophet Jsaia von seiner zeit klagt,
 Cap. 9: „Ein jglicher frisset das Fleisch seines arms, Manasse dem Ephraim
 vnd Ephraim dem Manasse, vnd sie beide miteinander wider Juda“¹⁹ etc., so
 sind wir doch in betrachtung vnd zeugnis vnser guten Gewissens vnd fried-
 15 liebender hertzen dieser gantzlichen vngezweuelten hoffnung, zuuersicht
 vnd vertrawens zu Gott dem Herrn, das seine hand dieses alles wol endern
 vnd seiner lieben Kirchen vnd vns zum besten wenden kan vnd wird; das
 auch, wie an gemelten ort Jsaiae gesagt wird, des Herrn hand vnuerkürtzt
 vnd noch ausgestreckt ist, nicht alleine die Gottlose Welt zu straffen, son-
 20 dern auch seine liebe, hochbetrübte, jemerlich zurissene vnd verwundte Kir-
 che zu befridigen, zu heilen vnd zu erretten.²⁰

Wir sind auch zu allen Christlichen, friedfertigen vnd der Warheit liebenden
 vnd begirigen hertzen der tröstlichen hoffnung vnd trewen zuuersicht, sie
 werden aus gegenwertigen [B 3v:] vnsern Artickeln Christlich vnd richtig
 25 vermercken vnd befinden, das wir ja des Sacramentschwarms nicht schuldig
 noch teilhaftig sind, auch fur vns nichts neues, frembdes oder hiebeuor
 in diesem streit vnerhörtes oder vnbrechliches furgeben vnd leren, sondern
 alleine das, das in Herrn Lutheri Schrifften, in Corpore doctrinae Christlich
 vnd wol gefasst, im rechten verstand zusammengezogen vnd ein klaren vn-
 30 terschied zwischen vnserer vnd der Sacramentschwermer Lere hiemit haben
 zeigen vnd Christliche hertzen dafür verwarnen vnd verwaren wollen.

Bitten demnach alle vnd jede Christliche hertzen hohes vnd nieders Standes,
 denen diese vnser Artickel furkomen werden vnd die etwan zu bösem arg-
 won vnd verdacht wider vns, vnser Kirchen vnd liebe Herrschafft durch vn-
 35 ser misgünstigen vnd Widersacher geschrey vnd lesterung, durch der Sacra-
 mentirer boshafft verkerung vnd endlich durch der vnsern vns vnbeuosten
 schedlichen zuneigung zu den Sacramentsfeinden vnd heimlichen verstand
 mit denselben bewogen sein [B 4r:] möchten, sie wollen vns solches ver-
 dachts Christlich erlassen vnd denselbigen jtzige vnser wolmeinliche,
 40 gründliche, deutliche vnd Christliche Erklerung entgegen setzen, die Ar-

¹⁹ Jes 9,19f.

²⁰ Vgl. Jes 9,20; 11,1–16.